

熙  
朝  
新  
語

熙朝新語卷十五

古款 余金 德水 輯

高宗純皇帝御極六十年。

壽寓宏開。篤生人瑞。各直省奏報耆民五世同堂。親見七代八代者。屢見邸抄。然未有如長洲蔣氏之盛者。乾隆丙寅春。內閣中書應焟之祖文源年九十。配張氏年八十九。翰林院編修元益之祖文涵年八十九。配顧氏年八十八。俱五世同堂。親見八代。應焟元益同日給假。回籍祝壽。海內榮之。時徐雨峯士林爲

巡撫製聯稱祝云。登甲登科。五代兒孫繞膝。難兄難弟。九旬夫婦齊眉。洵爲

熙朝盛事。

乾隆庚戌。恭逢

高宗純皇帝八旬萬壽。先期有

詔。以戊申鄉試已酉會試爲正科。己酉鄉試庚戌會試爲

恩科。己酉典江南試者胡閣學高望。賀考功賢志。選士公明。闈中向例。於

萬壽節將各房考首先呈薦之卷。取中一名。名曰恩卷。然間有二三場疵累或事故不到。不能入彀者。是科金山令奉天于滄來鰲圖房中首薦一卷。主司亟加稱賞。卽時批中。及填榜。拆閱彌封姓名。乃知是卷爲元和王壽祺。主司監臨及監試簾官輩。無不額手稱慶。

聖天子壽考作人。髦士嘉名。適符瑞應也。

長洲錢宮聲中諧。康熙己未博學鴻詞科。官翰林院編修。時湯文正公爲江蘇巡撫。贈以題額曰奎壁凝

東坡志林卷之三  
二  
暉。乾隆己亥宮聲元孫榮以第一人舉於鄉。辛丑公車北上時。夢五色雲自空飛下。中有蒼龍直前蟠舞。因以左手持龍角。右手取筆。大書奎壁凝暉四字於龍頭上。龍卽騰空去。尋中會狀。自前明正統商文毅公輅後。三百三十六年來一人。自唐元和張公又新至是。九百七十六年中第八人也。

高宗純皇帝御製三元詩

賜之。有王曾如可繼。違彌我心存之句。草茅新進而簡在。

帝心如此。豈非厚幸與。

乾隆甲辰。余在四川成都府城隍廟。見一道士清癯如鶴。髮半白。問其年。曰不知也。因言今歲聖駕南巡。惜未得瞻仰。

天顏。余異其言。因問吾師曾至江浙否。道士備述聖祖六幸江浙諸慶典。並沿途景亭名勝所在。厯厯如繪。非躬逢其盛者。不能道。殆二百歲人也。

崇化屯屬之刮耳巖。爲大金川要道。蜿蜒綫棧。約長三里。山巖如削。石壁峻嶒。俯聳作欲墮狀。下視大江。

蒼茫無際。濤聲雷動。往來者捫壁附石。轉側僂僂。勢與俱傾。苟一瞋眩。顛蹶無底。

王師平定。噶拉依循巖築石爲欄。行人過此。咸誦阿文成公之偉烈。北行七十里。名龍登碕。卽福貝子駐兵處。

福貝子康安後。追封郡王。大學士傅忠勇公次子。年十九。以頭等侍衛統兵。隨定西溫將軍福征大金川。叛酋莎羅奔進駐龍登碕。木果木兵潰。貝子以衆寡不敵。且戰且退。行至刮耳巖。莎羅奔墜馬。家人恐懼。委

之而遁。重慶營戰兵王貴。見貝子呻吟草中。奇其狀。貌負而疾馳七十里。抵沃什站。適阿文成公自西路撤兵至沃。一面飭令隨營太醫診視。立遣將備以安。輿送入關。五十年貝子節制全蜀。閱兵至渝。憶及王貴刮耳岳之功。立諭鎮將查訪。時王貴辭糧已久。孑然一身。補履爲業。以自給。貝子旣憫其邁。又感其勞。欲官于夫。長以酬之。王因年老力辭。貝子知其性耽麴蘖。爲置千金之產。俾得醉飽終其身。蜀人咸稱王之淳樸。而多貝子之勇於報德也。

乾隆辛未四月。

聖駕南巡至山東。撫臣准泰奏稱。山東之沂州府。舊爲瑯邪郡地。嗣號臨沂。

本朝因之曰沂州。尋陞爲郡。考之通志。該地爲漢臣諸葛亮及晉臣王祥。王覽。唐臣顏杲卿。顏真卿故里。是以城內舊有景賢祠。爲合祀亮與祥。覽及杲卿真卿等五臣之所。及忠孝祠。專祀亮祥於內。今各祠宇雖皆年久堙圯。而志乘載之。里民思之。並有諸葛城孝感河諸遺蹟存焉。此五臣者。如諸葛亮之鞠躬盡

瘁。殫忠漢室。偉業豐功。史冊炳然。至如王祥之純孝。  
格天。王覽之友于感母。洵皆至性出於醇篤。非僅爲  
一代名臣已也。若夫顏杲卿。顏真卿之節烈。萃於一  
門。孤忠標於千古。尤爲正氣凜然。是亮等不獨學術  
事功。彪炳載籍。且其忠孝友悌。實爲千古人倫坊表。  
今事遠年湮。各蹟雖沈榛莽。然里民之懷想芳徽。猶  
昭昭可考。茲當我

皇上翠華巡狩。聿修

慶典。可否仰懇

天恩將此五臣。或

賜扁額。或

賜詩章。一經

聖主褒嘉。則五臣之忠孝亮節。既得上隨

奎藻天章。永垂不朽。而

聖主表忠教孝之化。益覺光昭萬禩矣。奏上。蒙

賜七言詩一首。曠典也。

浙江蕭山張氏觀五采五昆仲。俱以資入爲郎。出宦山東福建。乾隆丁未歲。其家後園荒地上。忽出大竹

兩竿。枝葉凌霄。詫爲奇事。是年秋。觀五擢東昌府知府。采五擢汀州府知府。

乾隆辛丑十月。蕭山陸敬軒爲永城尉。署中舊有柳樹一株。年久半槁。命工伐之。鋸板見天然畫一幅。如淡墨寫成。左右峯石峻削。懸崖上有松一株。老樹一株。枝葉倒垂。松上纏藤累累。下有一叟扶杖立。高冠長袖。鬚眉宛然。左手納袖中。著芻前。右腳前行。露其舄。左腳隱衣下。回顧若聽泉狀。雖妙手寫生。不是過也。造物之巧。真有不可思議者。

畢秋帆沅爲陝西巡撫時。曾上華山頂宿僧舍。夢有  
人長身玉立。著古衣冠。拜之曰。某居此山中已及千  
年。近有僧人以大銅鐘挂吾左臂。吾甚苦之。乞爲解  
釋。明日入寺。果見有鐘一口挂大銀杏樹上。因命山  
僧移鐘別置他所。

秋帆先生生平於古人中最服膺蘇文忠公。每於十  
二月十九日輒爲文忠作生日會。懸明人陳老蓮所  
畫文忠小像於堂上。命伶人吹玉簫鐵笛。自製迎神  
送神之曲。率幕士及屬吏門生衣冠趨拜。拜罷張晏

設樂。卽席賦詩。秋帆首唱。和者積至千餘家。當時傳爲盛事。

浙江金華吳紫廷鳳來。乾隆庚辰進士。任廣西象州知州。境內有山。山上有龍潭。旱時祈雨甚靈。吳不信。嘗帶從役數十人入山禱雨。初見潭水甚清。一無鱗介。俄頃忽見有紅白魚數頭出沒其間。從者羅拜曰。龍神見矣。吳不信。引弓射之。一魚血淋漓帶箭去。衆惶懼不知所爲。吳大言曰。果係龍神。當現真相。吾始信耳。言未畢。四山昏黑。作雪霧。對面不辨人。潭水決

起數丈。龍頭仰浮水面。其狀如牛。雙角有鬚。兩眼若  
漆。而所射之魚。仍帶箭游泳於龍之左右。若侍從然。  
吳始信服。再拜謝過。未幾大雨如注。

琵琶亭在江西九江府潯陽江畔。題詠甚多。乾隆間  
唐蝸寄英司權九江。置紙筆於亭上。賈客能詩者輒  
令賦詩。開列姓名。交關吏投進。唐讀其詩。分高下以  
酬之。投贈無虛日。坐是虧累。變產以償。怡然絕不介  
意。去官後過客思之。爲建白太傅祠。肖唐公像於旁。  
至今尙存。

江陰李芥軒崧。隱居不仕。與其配薛素儀。更唱迭和。有前明趙凡夫陸卿子之風。一日夫婦對酌。偶以瓜子仁排作數行。芥軒云。細剝瓜仁排雁陣。素儀應聲云。輕移杯底印連環。一時傳爲佳話。

歙縣程道平坦。少習制舉業。不售。去而學賣。生平敬惜字紙。每行街市。輒注目四顧。恐有字紙棄地也。人以爲癡。程樂此不疲。倡惜字會。雇人拾剝。砌爐焚之。灰則附客舟載至江而沈之。如是者五十年。年八十餘。無疾而終。歿後旬日。示夢于其子曰。我前身乃文

帝坐下白驪也。夙根不昧。惜字一生。今往浙江託生爲士人。早掇科第。食其報矣。此乾隆五十九年事。常州孫氏祖塋。在府城西門外十里。乾隆間塋上忽生連理木二本。上合爲一。枝幹拳曲。人所罕見。至丁未科。裔孫星衍中進士第二人。由翰林累官至山東督糧道。曾作記刻石墓間。

乾隆己丑殿試。進呈十卷中。吳縣潘榕臯奏雋名列第七。以得信遲誤。

保和殿

御試不到。改爲內閣中書。一日劉文正公指潘笑謂同列曰。此

天子呼來不上船者。

吳縣潘芝軒世恩。生於乾隆己丑十二月。誕生前一夕。其祖貢湖贈公夢一玉麒麟自空降於庭。贈公取置掌中。宛轉化爲嬰兒。比長。天姿聰穎。器宇端凝。中癸丑進士第一人。歷踐清華。年四十官至尙書。

乾隆癸酉。太倉王生赴省試。有同鄉友三人託預定寓屋。恐臨期倉猝也。王因爲之稅屋三椽而已。下榻

於其旁屋內。越數日。王臥病。恍惚見呂祖入門。手持香圓三枚。王起迎之。呂祖搖首微笑曰。到口乃可吞耳。王不解所謂。翌日三人來。王亦病瘥。場事畢。三人皆捷。一解元吳溶。一第八名吳一桂。一十一名吳鏐也。

長洲蔣氏族最繁衍。其先世光祿公可竹墓在婁門外。塋基橋。五年合族會祭。於舟次肆筵宴劇。觀者如堵。乾隆壬辰二月。屆會祭之期。黎明有一白鶴舞於墓前。旋繞者再。四圍喜鵲結隊相隨。逾時始散。是年

少司馬元益膺

覃恩一品封誥。四世俱仙鶴補服。閱二年奉

命典浙江鄉試。撤闈後得

旨給假回籍省墓。里人榮之。

蔣參議祠在虎邱。祀明天津兵備參議燦。孫贈兵部  
右侍郎之逵配焉。乾隆乙酉

高宗南巡至虎邱。見參議祠前斗標林立。

上曰。這是那一家。時扈

蹕大臣以山東學政蔣元益家祠對。

上曰。原來是念書人家。勝國名臣重邀

溫諭。尤爲異數。迄今里人尙呼爲旗杆場云。

蔣佚圃贈公舊第。在郡城福濟觀西。門首貞節坊。爲  
贈公嗣母盛太夫人建。自康熙初至今。綽楔巍然。左  
右屢遭回祿。坊獨保全。乾隆五十年間。鄰近大火。太  
夫人元孫媳陳氏。亦節婦也。居第內後樓。望見火勢  
方熾。一星冠羽衣人。凌空指揮。若保護此坊也者。因  
得無恙。陳氏夜夢太夫人語曰。上帝嘉我生前貞節。  
故臨災之際。神明庇佑。今吳縣節孝祠中。木主首列

者卽太夫人也。後裔成進士者十二人。登賢書者三十餘人。其食報如此。

高郵州廨東有狀元墩。祀文昌神。神前有一騎。俗呼曰白特。甚著靈顯。王文肅安國。夏筠莊之芳。夏醴谷之蓉。三公爲諸生時。會文於此。文肅嘗夜入文昌祠。祠前故有一小橋。履橋上軟如綿。初不覺也。旣至。祠僧驚曰。橋圯矣。君何從來。文肅茫然。次早見神前白特。四足泥淖尙津津然。疑夜所履者卽此也。後三人皆成進士入翰林。惟文肅官至尙書。

俞貞女名杏貞。金匱人。翰林肯堂女弟也。許字高郵。明經金蘭。未嫁而蘭卒。女聞絕食死。女能詩。嘗過露筋祠作詩曰。遺烈傳千古。聞名似讀銘。噬膚空幻相。屹石護貞靈。未見野蓮白。惟傷沙草青。崇祠留砥柱。多少女郎經。時人以爲詩識。所著有杏軒集。

蘇州周勗齋明德。官蜀中最久。嘗隨福郡王入西藏。見唐古忒風俗。人死卽齧割以喂鷹犬。謂之天葬地葬。又割天靈蓋作盂。貯酥油供佛。明德乃稟駐藏大臣。出示禁止。其略云。

欽差駐藏大臣示。爲禁止鬻割死屍。以重人倫。以厚風俗事。照得天地至大。凡一切知覺運動之類。惟人最靈。惟人最貴。無論山陬海澨。但係人類。莫不有父母焉。但有人性。莫不有不忍之心焉。既有此心。則君臣父子夫婦兄弟朋友。俱至親至愛之人。生時團聚歡樂。死後哀戚悲慟。人有同心。理固然也。乃唐古忒俗崇佛教。賦性愚頑。積習相沿。無情無理之事。不可枚舉。卽如人死殘割。與鷹犬掠食。謂爲天葬地葬。竟與禽獸無異。本部堂奉

命駐藏。治理斯民。蒿目疚心。不忍不廣爲訓誨。俾佛地番民。共曉

聖教而遵

王法。從此養生送死。倫紀無乖。乃至願焉。查律載笞杖徒流斬五等。所以治罪人也。至於剝尸梟首。尤爲極重之刑。其謀反叛逆。弑父殺兄。妻殺夫。乖亂倫常之人。方予凌遲處死。今唐古忒民人。各有父母兄弟妻子。在生極其憐愛。迨其死後。卽將尸碎割以喂鷹犬。其子其弟其婦在旁觀矚。不以爲慘。反謂得受好

處有是理乎。試思爾之父母。生而獲罪。爲王法所加。或斬或劓。其子尙爲哀痛。或爾之父兄。爲仇人殘害。其子弟尙欲報復焉。有一生無罪。幸得善終。反被自己妻子凌遲殘忍凶惡。一至於此。雖日夜誦經懺悔。何能消罪于萬一耶。爾將父母屍身殘毀。喂鷹喂犬。故爾之子孫。亦將爾屍照樣割裂。此卽明示報應。可不猛然省悟乎。嗣後人死。概不許殘毀以喂鷹犬。自己已有莊田者。于莊田內埋葬。如無莊田之貧民。現由達賴喇嘛撥出荒山。立爲義塚公地。報官卽與掩埋。

尙有無知番民。仍不遵奉。卽治以不孝之罪。凌遲處死。母貽後悔。特示。自示之後。唐古忒民人感化凜遵。頓改惡俗。仁人之言。其利溥哉。

山東庠生張大美。素奉關帝甚虔。乾隆乙亥。張患病甚劇。恍惚間夢至關帝廟。見帝方陞殿理事。著

本朝衣冠。威儀嚴肅。張怵息不敢仰視。有頃聞呼張名。張匍匐至階下。帝在殿上語之曰。吾廟中楹柱對聯。膚泛俚俗。甚不愜意。爾與吾有香火緣。其爲吾改之。張跪誦一聯云。數定三分。扶漢室削魏伐吳。辛苦

備嘗。未了平生事業。志存一統。佐

熙朝。伏寇降魔。威靈丕振。只完當日精忠。帝深加歎賞。曰。此四十二字。爾來歲當知好處也。張叩謝出。遂寤。不解來歲何云。次年鄉試。首場。張坐矮屋中。構思未就。倦而假寐。夢帝肘之曰。起起。爾忘對聯字數乎。張驚醒。文思沛然。援筆立成三藝。如宿構然。是科中式第四十二名。

蘇州府城圓妙觀之東。爲臨頓里。有錢某者。以賣藥爲業。謹愿性成。市價不二。里人重之。一日。錢方據櫃

板修治藥料。忽有一癩道士。抱一臃腫幼童置櫃上。撫弄之間。三遺其矢。店夥大恚。將加詆誅。錢諭止之。道士曰。居士善人。吾令吾徒自己收拾可耳。卽呼童俯拾所遺矢納口中。錢察其異。亟奪之。道士已肩此童去。步如飛。遙望之。所負非幼童。乃一葫蘆耳。因悟此道士必呂祖也。櫃上遺矢之處。異香經月不散。人有異疾不能瘳者。試刮板屑少許。和藥以進。病良已。不逾月。櫃板洞焉。時人咸以錢家藥店呂祖曾到。利市三倍云。

梁溪俞蓉汀大鴻。幼警悟。嗜學工詩畫。得唐宋人意。及長。循例入太學肄業。歲需膏火。自顧弗遑也。有吉水某。與俞素相善。遊學至都。遘疾不起。俞經紀其喪。盡罄己資。且撫育其十歲孤兒。延師課讀數年。學大就。適俞以考職發河工。將出都。以某尙未歸葬。其子不能獨留都下。急託其鄉人。給資令扶櫬同歸。其子旋游庠食餼。感俞高義。至今尸祝之。俞年四十九。無疾卒。著有蓉湖吟草。

定州唐河近村。爲西山衆水所歸。驟長丈計。依阜而

居者時遭水厄。有王某者耕於田。見水忽至。急趨至家。遇妻在戶。卽負之走。妻大聲呼止之曰。母在內。何先顧我也。某舍而負母。置之阜。歸救妻。則水已及丈。居毀而妻無跡矣。奔告母。母痛甚。望水泣不已。尋見一屍浮近阜。某力挽出之。卽妻也。母益痛。撫屍大慟。某亦視而泣。妻忽蘇。張目如夢醒然。形氣無恙。母子告以故。始覺再生。未幾水落。仍安居如故。蓋造物嘉其孝。特活之數外也。

容城張進士南川。父某以歲貢銓恒山學博。食俸十

二年積金八十。孺人以公年屆六旬。己年亦五十有七。子嗣無望。力勸歸田。公從之。乞休返行。裝蕭索。不及一肩。次保陽旅邸。聞鄰婦老少相泣。異而詢之。知老婦有子。爲催科役。虧官糧三十餘金。限甚迫。其妻計無所出。將自鬻以償。是以悲耳。公惻然欲解囊以濟。慮孺人中沮。太息不止。孺人先亦詢知始末。亦以力薄。斂容不敢請。公會其意。以告孺人。慨然如數代償。全其骨肉焉。次早車過西城舊石坊下。聞空中云。該死者至矣。又有人云。昨以積善免。且有一子登第。

語甫畢。石坊崩。去車尾僅尺許。既歸。孺人以車中所聞語告公。曰。一念感天。君或者其有後乎。勸之置妾。不可。未幾。孺人信水復至。居然生子。卽南川也。遠近聞而異之。南川幼聰穎。年十七成進士。出宰百里。二老人就養任所。俱享大年。積善之報也。

江北張某。爲人經紀。收債於江寧。歲暮將歸。黎明肩行李出城門。未啟。立市簷以待。倦甚。以置金之布搭坐身下。方閉目。城遽啟。忘攜身上布搭。僅肩行李趨出。行里許始覺。急返覓舊所。已各肆俱張。人如雲集。

而布搭不知去向矣。於此愁眉觀望。徘徊不已。一老者詢故。以實告。邀張入曰。今早啟門。得有遺物。未識相符否。張曰。爲東人歸者兩大封。其小封則己物也。錠數分量各若干。老者驗係原物。卽還之。張感泣。愿以己金奉。老者笑曰。吾果愛財。頃則不言矣。君何不諒也。張不敢強。因拜謝。各道姓名而別。張抵江待渡。而風大作。渡舟多覆。溺人無算。張惻然曰。吾所攜之金失而復得。吾命亦屬再生矣。悉出己金。買救生者。操舟往救。立拯數十人。皆感謝。彼此通姓氏。中有一

少年江寧人。往江北貿易。回家度歲。卽還金老者之子也。張異而告以故。聞者莫不歎息。後二氏結婚姻焉。可見濟人卽自濟也。

元和施季子澹。性至孝。父病目翳。以舌舐之。二十日盡去。目復明。母病痢。五月不止。割臂肉和藥以進。病立起。母思食梨。時尚未有。忽來一老嫗遺之。澹上有三兄。伯早卒。仲叔常客遊。澹奉父母。索逋于東昌。一夕夢黃衣老人曰。爾父病亟。澹驚起。卽刻束裝歸。至江口。陰雲四合。將有大風。舟人相戒無渡。澹涕泣叩

頭。一老篙工哀其誠。渡之。中流舡幾覆。忽聞空中語云。謹護施孝子。厥後其孫文燾舉於鄉。請旌如制。

熙朝新語卷十五

熙朝新語卷十六

古歙 余金 德水 輯

歙縣洪桐生梧。乾隆庚子。恭應

南巡召試。

欽賜舉人。後中庚戌科進士。散館。授職編修。嘉慶元年正月。

太上皇帝授寶禮成。羣臣上表稱賀。翰苑諸臣各進詩賦詞章。俱蒙

睿賞。

頒賚有差。桐生獨出機杼。敬撰

萬全全韻頌進呈。洋洋萬餘言。導揚

盛軌。無一膚泛語。

聖心嘉悅。拜蟒袍文綺之

賜。是年冬。

簡授山東沂州府知府。先是桐生之兄名樸名榜者。俱以

召試邀

恩。歷官至知府。後先接踵。若合符節。亦見文人遭際

之隆也。

嘉慶九年八月奉

上諭。朕兄成親王。自幼精專書法。深得古人用筆之意。博涉諸家。兼工各體。數十年來。臨池無間。近日朝臣文士之工書者。罕出其右。早應摹勒貞珉。俾廣流傳。而王撫謙自矢。不肯遽付鈎鐫。昨特命軍機大臣傳旨。諭令將平日所書各種。自行選擇刻石。始據王具摺陳謝。遵旨於回京後覓工摹刻。著照所請。以貽晉齋名。顏其卷帙。王卽繕朕此旨。勒冠簡端。以當製

序。本日王所奏之摺。亦著另書一通。附刊於後。以誌一時翰墨欣賞之盛。欽此。王道

旨。勅石壽世。藝林寶貴。珍若球琳。洵

熙朝盛事也。

錢唐錢聲谷槐。弱冠遊庠。屢困場屋。嘗祈夢于忠肅祠。夢忠肅示一紙。大書十六字曰。尙早尙早。來不湊巧。若問功名。綠衣人小。醒而不樂。謂中期尙遠也。然綠衣句不解。所謂嘉慶甲子。潘芝軒司農典浙江試。聲谷始領薦。年已六旬。謁見座主。詢及入學年歲。具

以實對潘拱手致敬曰前輩前輩是年家大人入學某尙未生也。因悟夢兆之巧。此事與劉子壯夢出朱之弼房中相似。

嘉慶辛酉。邕縣天后宮紫橿花盛開。花類牽牛。有小鳥翔鳴其間。丹喙金距。文彩徧體。形似鳳而小。羣鳥隨之。不可勝數。居人以得見爲祥。不能比歲然也。石門顧輯五述。

嘉慶乙丑三月。簡州徐刺史鼎。奉檄赴嘉定催銅。夜夢五人從東來。自稱行疫使者。將赴成都。問何時回。

去。日過年看龍燈方回。後徐回省。適見瘟疫流行。憶及所夢。告之總督。令府縣曉諭民間。以五月朔大張燈火。如元宵故事。自錦江門以達鹽市口。金鼓震地。燈火燭天。花炮煙火徹夜不絕。各官復捐俸。延僧道設壇誦經。如是者五日。時疫遂平。豈厲鬼亦可以術結之耶。或曰是良有司痼瘼在抱。足以感嘉祥而消沴氣也。

播州老瀛山之白瀛觀。志稱老君修煉於此山。門前石梯百餘級。水經石竇中。淙淙可聽。崖上鑿梯步鳴。

琴四大字。筆力蒼勁。山門之左。瀑布千尺。從崖瀉下。彷彿廬山面目。觀之南。兩峯夾峙。處跨以石橋。勢若飛虹。下臨絕壑。名曰飛仙橋。橋南石筍一株。峻削直上。石下一洞。內供大土像。題曰臥雲枕月。石筍稍南。有玉井焉。甃以白石。覆以松檜。相傳飲此者多壽。碁盤崖石。几石椅。狀皆極肖。遠望之如懸峭壁間。崖路一綫。緣援而上。山上異景頗多。不能殫述。其最奇者。莫如香碑。削壁萬仞。崖際忽吐一石如舌形。大似三間屋。圍以石楠。香碑嵌石壁上。字類古篆文。模糊不

甚可辨。遊人以絹拭之攜歸。其香經月不散。從玉井左轉。以鐵鍊承木架浮梁。以達香碑。余於甲子春過播州。遊白瀛觀。見一老道士。類百餘歲人。操秦音。喜著高腳木屐。其行甚捷。問其年。笑而不答。或曰明季避流寇時卽居此。

國初時尙與鄉先生賦詩贈答。年來益與世俗相遠。觀中住持卽其徒孫。年亦九旬矣。蓋道士皆飲玉井泉者。故多壽云。

邛州火井。槽產鹽而乏柴草。竈戶全賴井火以煎熬。

色類螢火。以猪尿胞吸其氣。能攜之遠方。用大鍼刺一孔。以火蒸之。卽然。光大如豆。終夜不滅。余過邛州時。曾親試之。

余幼時讀莊子。北溟有魚。其名爲鯢。化而爲鵬。其翼若垂天之雲。以爲莊叟寓言。未必實有是物也。後閱南滙縣志載。

國初時有大魚過海口。其高如山。蠕蠕而行。過七晝夜始盡。終未見其首尾。嘉慶甲子。山東登州府蓬萊縣濱海處。一日忽有大鳥從空飛過。兩翼垂天。晝爲

之暝。城內外人觀者億萬。咸恐懼羅拜。逾時始不見。  
豈卽莊子所謂鯨鵬耶。

嘉慶丙子十月。江蘇海州。據報沿海有大魚一頭。兩  
目已剗去。計長三十六丈。目背脊至腹高七丈有餘。  
居民咸齧食之。其肪甚厚。腥不可聞。較諸南匯縣志  
所載。渺乎小矣。

嘉慶丁巳。南康謝蘊山啟昆爲浙江布政使。闢署中  
園屋。得永平磚八塊。大喜。以爲晉惠帝時物。遂名此  
室曰八磚書舫。賦詩紀之。一時和者百餘人。或以爲

明永平厰所造。非晉磚也。方伯曰。區區瓦礫。何足深究。嘗見鑒古家。每得一物。斷斷聚訟。甚至穿鑿附會。何不如方伯之見超也。

無錫唐孝女素。少有至性。慕北宮女之爲人。居惠山之麓。賣書畫以養父母。至老不字。士大夫重其人。往往函金購尺幘。視若奇珍。嘉慶初。邑紳請於有司。詳題得。

旌典。聞今尙健在。年近七十矣。

長洲張孝女壽姑。居澣墅關。有殊色。尤精女工。髫年

喪母。其父爲之擇壻某。喜狹邪遊。染惡瘡。潰爛無人  
理。舅姑不得已。央原媒退婚。女父本婁人。心竊喜。蓋  
關部丁胥艷女久。爭欲聘之。千金可立致也。女持不  
可。曰。兒一人。寧字兩姓耶。父曰。吾小家何所忌。女曰。  
家有大小。禮無大小也。兒願終身事父。十指足以供  
甘旨矣。父憫而從之。後父病。奉侍四十餘日。目盡腫。  
夜禱天。願以身代。剖臂肉以進。病良已。閱三年。父又  
病。奉侍顛禱如昔。仍剖肉以進。愈匝月而歿。女出衣  
飾。盡粥之以治喪具。旣葬歸。自沈於宅後。尤家浜。時

六月盛暑。殮之日。面色如生。異香噴溢。閭里咸爲歎息。嘉慶甲戌得

旌如制。

嘉慶甲戌春。潞河白洗馬銘。督學安徽。幕士吳秋舫潮。訪知青陽徐孝子事。聞於使者。使者曰。表微勵俗。余之責也。按試日。詢諸生。皆曰信。遂表其廬曰至性感人。并爲之傳。其略曰。孝子姓徐氏。名守仁。世業農。孝子四歲而孤。未嘗讀書。事母孝。晨昏視問。悉如禮。爲人傭。得值則市酒肉歸奉母。母呼孝子共食。輒以

持齋謝。蓋不忍分其甘也。母年七十六而終。孝子哀慕若孺子。既葬。孝子露處墓側。號泣十餘日。蛇虺附體不顧也。鄉人憐而爲之廬。且飲食之。孝子乃並奉其父木主以居。有弔問者。鋤楮外悉不受。既免喪。或勸之歸。孝子曰。必俟母過八十壽而後歸。於是守墓凡四十有二月。歸時則鬢髮垂一尺許矣。使者聞而歎曰。吾人自束髮受書。少而負笈。長而服官。大抵奉親之日少。而違親之日多。及抱恨終天。又或牽於塵累。求如孝子之盡禮者。終不可得。乃致父母有富貴。

子不如貧賤子。可勝痛哉。

崑山徐孝子者。軼其名。大司寇乾學之元孫也。父某爲邑諸生。放誕不善治生。家貲蕩然。生徒亦散盡。孝子年十三。學未竟。卽爲縣胥鈔寫。得值以奉父母。父故嗜酒。每飯無三爵。不能舉箸。孝子力不給。費於肆久之。不能償。恐市僧之怒之也。日過肆中學柳敬亭抵掌談三國隋唐演義。聲色俱肖。市人悅之。竟不問酒值。已而遂佯狂歌唱。藉此易酒肉。甘旨幸無闕。父歿。母病。孝子又苦目眚。不能作書。居然抱絃索彈育。

詞以爲故業矣。崑邑於雍正十年分設新縣。曰新陽。另建城隍廟於城東之羅漢橋。卽葉文敏家半園園故址也。孝子每日歌於斯。聽者雲集。日將午輒告歸。強留之則泣下。衆異之。或尾之去。則以所得金錢市飲膳歸。母食已餒而後復來。率以爲常。或詢其家世。則僞爲髡狀。慙笑而已。蓋以操術旣卑。不欲汚先人門閥也。其母死。孝子遂不見。或曰自沈於河矣。衆呼之曰徐癡。嗚呼。是真癡也耶。是孝子也。亟書之以寤世之不癡而癡者。

嘉慶庚申

恩科。浙江解元崔懋駟。嘉興人。江南解元崔錫華。荆溪人。係近族分居。占籍兩省。同時領解首。次年辛酉正科。江南解元崔暄。卽錫華一家。同族兩科三解元。古所未有。

山東諸城劉沁芳尙書。祖母顏太夫人。前相國文正公之繼配。文清公之母也。嘉慶辛未。尙書督學江南。迎養太夫人於江陰使署。值太夫人九十誕辰。文清公恭奉

恩命。前赴江南爲母介壽。

天章炳耀。

錫予便蕃。朝野榮之。公卿大夫各有嘏辭聯句贈行。記其一聯云。

帝祝期頤。舉朝祝期頤。合三代之門生。亦共祝期頤。八座

恩榮昭海內。夫爲宰相。哲嗣爲宰相。備六官之文孫。又將爲宰相。九旬福曜蔭江南。一時傳誦。洵古今所罕有也。

嘉慶丁巳忻州崔西山映辰令山東蘭山時署中有  
老民池姓者。擔水夫也。相傳自康熙間受僱供役。其  
時年已四旬。生平無所嗜好。亦未有室家。所得傭值。  
輒分給其曹偶。人咸昵之。歷任縣令亦知其愿且勤。  
令督率諸夫。儼然頤指氣使。不徒恃力作矣。乾隆三  
十年。年逾九十。循例宜邀粟帛之  
賜。令欲爲之請。池堅辭曰。小人薄福相。天特予之壽。  
幸矣。一旦謬膺

恩錫。恐折將來壽算。盍少留之。以縣未盡之年乎。令

題其言。事遂寢。至是西山爲之詳請題咨。蒙

賞六品頂帶。時年一百二十六歲。余在蘭山親見其人。體癯而神清。聲啾啾如嬰兒。隆冬常科首。汗氣蒸蒸上騰。庶幾其能葆真者。

四川松茂河水湍急。力如勁弩。不宜舟楫。乃施石柱於兩岸。繩亘其中。上繫木筊。其名曰橦。欲渡者以繩自縛於橦。兩手緣索而進。卽至彼岸。復自解之。嘉慶甲子。蜀人張遠峯言其曾祖某弱冠時過此河。縛甫竟輒解。身已離橦。瞋眩欲墮。恍惚中似有人爲之維

繫。又從而推挽之者。因得渡。後生八子二十孫。及見曾孫十一人而歿。壽八十有九。諺云。大難不死。必有  
大福。不其然乎。

嘉慶庚午四月。高郵州西門外。臨湖石隄傾圯。河帥  
委員修築。有州署幕友夏友香者。督工役往來於隄  
上。日將暮矣。忽見湖中城市顯然。林木繁茂。斷岸一  
帶小橋亘之。橋旁有斥埃。列柵拒馬咸備。橋上有人  
持破傘。作迎風急走勢。而柳陰之下。二驢齟齬於其  
閒。其時落日沉山。暮霞四起。適當湖中城門隙處。金

碧萬道。沿堤水紋如縠。與夕陽相激蕩。光怪陸離。不可名狀。城中炊烟縷縷。人影幢幢。傑閣嵯峨。浮圖高聳。鍾聲如在耳也。晚風乍起。而所謂城市林木橋亭。斥埃者。漸淡漸遠。然已數刻矣。嘗聞山東登州萊州有海市。四川青城錦城有山市。今高郵更有湖市。亦奇觀也。

長洲蔣竹浦封翁。以厚德推重鄉里。督課子姪。期望甚殷。嘉慶戊午八月初八日。封翁長子雲篋名泰堦。赴秋闈。封翁詣關帝廟祈籤。得四句云。萬人叢裡逞

英豪。便欲飛騰霄漢高。爭奈承流風未便。青燈黃卷  
且勤勞。是科雲筭中式第四名。首句之驗。己巳捷南  
宮入薇省。次句之驗。中間三薦春闈。一取謄錄。一挑  
教職。三四句之驗。雲筭座師爲萬和園侍郎。名承風。  
姓名悉見于籤。尤奇。

嘉慶戊辰七月望日。蔣竹浦封翁詣關帝廟祈籤。首  
句羨君兄弟好名聲。末句巍巍科甲兩同登。是科鄉  
試。封翁仲子琴史名慶均與堂弟蕁汀名庭芝同榜。  
閱六年甲戌會試。琴史又與堂兄建堂名元封同榜。

甲戌

殿試前。封翁詣呂祖廟祈籤。有衣冠身惹御爐香之句。琴史果館選。又琴史公車至都。在正陽門關帝廟求籤。有彼此懷疑不相信之句。果以提塘報條錯悞。家中遲報十日。又琴史祈籤。有萱堂快樂未渠央之句。時封翁母陳太恭人尚在堂。親見兩孫聯登館閣。一時稱爲盛事。

封翁宅在郡城西花橋巷之東。巷西有張氏旗杆。年久潰爛倒地。嘉慶癸酉秋大雨。積潦盈尺。旗杆順流

浮抵蔣氏門首而止。明年琴史入翰林。蓋已爲之兆矣。

嶺西藍祥善繪事。年一百四十四歲。猶能畫大幅人物。嘉慶初

恩賜六品頂帶。壬申年錢唐梁侍講同書。得其所畫壽星一幅。爲之題識泐石。時梁亦年至九十矣。國琛人瑞。此之謂與。

吳縣城西北有桃花塢。方志稱爲宋樞密章棨別業。唐解元寅築居於此。有夢墨亭。有祠祀六如居士及

祝京兆允明文待詔徵明。天啓時楊端孝大滌改爲  
準提庵。

國初宋中丞瑩重加修葺。增建才子亭。百數十年來  
行就隕廢。嘉慶六年。善化唐觀察仲冕知吳縣事。因  
拓庵東別室。移祀唐祝文三君像。顏其室曰桃花仙  
館。且訪得六如居士墓在胥門外橫塘王家村。封植  
而題識焉。并賦七律八首。一時和者如雲。不可勝記。  
記其原唱云。綺羅絃管總成塵。一種才華閱世新。縱  
酒地爲澆酒地。看花人是種花人。可憐謝客無遺宅。

何必逋仙有後身。燕麥兔葵芟剔盡。絳桃依舊占芳  
春。第一風流自愛名。佯狂獨得聖之清。奏書不逐嚴  
夫子。搥鼓真同禰正平。半偈悟禪空電逝。小樓讀畫  
尙花明。饒他文酒求餘韻。三百年來識此生。吾宗衡  
後數尤奇。牢落悲深曠代知。司馬青衫同灑淚。尙書  
紅杏舊題詞。謂宋商邱中丞銜碑土近要離冢。拾翠人歸短  
簿祠。千古英豪齊下馬。況傳華胄備官司。荒烟蔓草  
賸寒燈。仙館重開問寺僧。五十步分樵采路。三千界  
埽辟支乘。乞花好句留楹帖。近得居士真蹟夢墨遺

一聯刻之祠楹

編付剡藤表墓式間吾豈敢名流好事寫韓陵白玉  
樓成隔兩塵水村山郭幾番新未知若箇眠雲處想  
見當年荷鋪人蘭若舊藏題後碣菰蘆雅稱夢中身  
橫塘十里秋聲館合與芳園一例春荒邱冥漠不書  
名訪到山橋澗水清指點青嶙孤月出侵尋黃壤亂  
雲平一抔馬鬣新封大三尺雞碑小記明過客莫歌  
蒿里曲早歸兜率悟無生菱芡重重鼎俎奇橫阡設  
祭墓雅知唐風剩有毛萇傳楚些曾無宋玉詞崇禎甲申  
毛子晉嘗封表之置墓田可舍紀以碑地以滄桑沈  
今蕩然無存惜商邱中丞未曾議及

斷礎。人於伏臘走叢祠。秋來雁稅從新占。憑仗村翁  
社媼司。文人慧業照元燈。墓前碑仍題明唐解元煙穗前生記  
老僧。花鵲吟梅延客賞。石湖釣艇浦吾乘。城闌更注  
十年漆。松茂長擎百尺藤。疑冢卻嗤銅雀伎。空教賣  
履望西陵。

新進士釋褐後謁國子師。大司成例得坐受。無少遜。  
且當新貴展拜時。戒不得動。若頭動。則於一甲第一  
名不利。左右手動。則於一甲二三名不利。俗說如此。  
然輒有奇驗。嘉慶辛未。天門蔣丹林祥墀爲祭酒。一

甲一名蔣修撰立鋪卽祭酒子也。父子行此大典莫不羨其遭際。有朝士贈詩云。回憶趨庭學禮時。國恩家慶喜難支。阿翁不敢掀髯笑。怪底郎君拜起遲。詩近諧亦佳話也。

蘇州府城東史家巷蔣氏有二第。門首俱豎旗杆。一爲庸德堂。乾隆癸巳夏雷震旗杆木。明年甲午肯菴明府基順天中式。乙未聯捷會魁。一爲亦政堂。嘉慶丁巳除夕鄰家祀神。爆竹火熱旗杆上。光燭通衢。明年戊午雲甚主事泰堦中鄉魁。己巳

恩科成進士。識者以爲雷震火災。皆文光騰上之徵也。

蘇州府城閭門外。南濠之黃家巷。古名雁宕里。相傳都少卿讀書燈。卽其地也。明時尙係近城曠地。煙戶甚稀。至

國朝生齒日繁。人物殷富。閭閻且千。鱗次櫛比矣。巷內何姓。素稱積善。數十年來。耆瑞屢徵。天之所以待之者亦厚也。乾隆壬午。何厚齋名麟之妻周氏。年八十八。以五世同堂。有司上其事於

原草志言  
朝得

旌如制。乾隆壬寅。厚齋之子何墨畊永鉅。年八十二。又。以五世同堂得

旌典。至嘉慶丙寅。墨畊之子何勉耘漣。年八十四。又以五世同堂請

旌。邀

恩。賜八葉衍祥扁額。閭里榮之。祖孫相繼三次。以五世同堂得

旌。世所罕有。

淮安太守趙公名璠。因公赴徐州。途次見推小車者。將客。行李拋擲路旁。怒形於色。不願推送。客錯愕。無所措。趙停車問之。車夫乃言曰。小人自徐州受雇。推送此客。行三日矣。尙不知其姓。今日偶問及。知伊姓秦。小人姓岳。安能爲仇家作僕御耶。趙大笑。因諭之曰。秦岳之仇。乃六百年前事爾。何憾於客耶。車夫乃悟。趙與之錢二千文。命仍送客往。此與皮匠殺秦檜事相類。真赤子之心也。

乾隆甲辰歲。潘樹庭世榮與其弟芝軒世恩同遊於

庠有梅溪居士者。爲作棣萼聯芳圖以賀之。三十年來。芝軒官至尚書。樹庭以中書引疾歸里。嘉慶丁丑。樹庭兩子曾彥。曾綺亦同遊泮宮。居士又作紫薇雙照圖爲贈。系以詩云。棣萼才名本出羣。一枝先發上蒼雲。惟君獨享山林福。不作人間出岫雲。三十年前事偶同。秀才原是舊家風。春來第一開心事。又見雙雙入泮宮。可添入玉堂佳話。

元和俞冠三濂。於乾隆戊寅年入學時。有白鶴翔於庭。咸以爲瑞。至嘉慶丁丑。冠三年已八十。雙鵲異常。

又見白鶴來翔。擬於戊寅。秋應。

恩科鄉試。是冬循例應得重遊泮宮。亦

熙朝人瑞也。

熙朝新語卷十六終

熙朝新語卷十六

六